

Åråsvågen Velforening,
v/leiar Jarle Dalberg,
Åråsvågen 226,
5943 AUSTRHEIM.

Mob. 902 07 968

Åråsvågen 29.11.2018

Austrheim Kommune,
Sætremarka 2,
5943 AUSTRHEIM.

KOMMUNEPLAN-AREALDEL I AUSTRHEIM KOMMUNE 2017-2027

TREDJE GONGS OFFENTLEG ETTERSYN; HØYRINGSUTTALE:

Åråsvågen Velforening har 30 medlemmer som er hus- og hyttteeigarar ved Øksnesmarka/Åråsvågen, og det er no 10-12 år sidan områda blei bygd ut. (BH 5, 6, og 9).

Vi vil på det sterkaste gå imot at det vert etablert industri/bergverk, (Matrikkelen), eller anna naturøydeleggjande verksemd i Øksnesmarka med djupvasskai i Åråsvågen.

Øksnesmarka/Åråsvågen vert mykje nytta til tur og rekreasjon, og av Velforeininga sine medlemmer, og det var aldri nokon av kjøperane her ute i Åråsvågen som blei orientert om at det var planar om eit stort industriområde med djupvasskai like i nærleiken.

Kva slag næringsverksemd kan vi så venta oss her ute, på industrisområdet og djupvasskaien, og som vi her skal meina noko om?

Dei omfattande planane for Øksnesmarka Ordføraren synte til i kommunestyremøtet 02.11.2017 verkar på oss mest som lause tankar og luftslott.

Då er det vel meir hald i planane om industriområde og storkai som entreprenør Odd Haugen no har fremja gjennom Advokatfirmaet Steenstrup Stordrange DA (skriv til Austrheim kommune dat. 12.02.2018).

Kort kan det seiast at det heile verkar skremmande på oss. Innhaldet i desse planane er at Øksnesmarka og deler av Åråsvågen vil bli øydela som natur- og rekreasjonsområde, og også at plante- og dyreliv – stort og smått, vil bli uoppretteleg skadd eller øydela. Planane til Odd Haugen om ei trinnvis klargjering av industriarealet er ikkje på nokon måte godt nytt for oss, dette vil medføre at vi vil få sprenging og steinhåndtering nært innpå oss i lange tider framover.

For oss er det ikkje til å fatta at fleirtalet av den politiske leiinga i Austrheim kommune vil leggja til rette for «Industri og bergverk», med tilhøyrande store prosjekt når det gjeld anlegg og infrastruktur, og dette i urørd natur. Og for å ta eit konkret døme, kva med havørna og oteren som held til i området i dag?

Likeeins er det utruleg at fleirtalet av lokalpolitikarane våre kan meina at det er greitt at bustadområder og tung næringsverksemd kan vera nære naboar.

Skulle dette blir ein realitet vil det gå på helsa laus for mange menneskje.

I høve til næringsområdet og djupvasskai vil vi tru det kan verta aktiviteter døgeret rundt, vekedagar og helger.

Her ute er det skjeldan vindstille, og lyd ber utruleg langt. Det vil seia at både fastbuande og hyttteeigarar i området vil verta plaga med støv og støy nærast til alle tider.

Vi fryktar også at fisket i Åråsvågen vil bli dårlegare, t.d. avrenning frå sprengingsarbeid og steinuttak, anna

arbeid på området, og varig endra ferskvasstilførsle. Vi fryktar også at det kan verta restriksjonar på ferdsla i området ved djupvasskaiaen. (Jfr. Mongstad).

Industriområdet og djupvasskaiaen vil også vera ei visuell ureining av et slag vi ikkje hadde trudd at nokon kunne gå inn for i vår tid. Vi meiner difor at Austrheim kommune sitt arbeid med å leggja til rette for industriområde med djupvasskai i Øksnesmarka/Åråsvågen direkte skadar interessene til Velforeininga sine medlemmer, og dette etter at vi opplevde nærast å vere inviterte av Austrheim kommune til å byggja og busetja oss her ute.

Så er det slik at gjennom hausten 2017 har Multiconsult, på oppdrag frå Austrheim kommune, utarbeid «Konsekvensutgreiing og ROS analyse» for Øksnesmarka.

For oss verkar denne rapporten solid i høve sjølve Øksnesmarka, sjølv om vi tykkjer at den totale biologien i marka skulle vore breiare undersøkt, og gjennom heile året. T.d. kva med amfibiar og anna liv i myr og vassdrag? Eller med hjorten? Vi undrar oss også over at Åråsvågen er vurdert berre i høve (delar av) strandlina. Det er ikkje sagt noko om sjølve Åråsvågen, det maritime livet der, og heller ikkje noko om fuglelivet i og rundt Åråsvågen. Vi støttar sjølv sagt likevel Multiconsult sine konklusjonar der dei til 2. høyringsrunde slutteleg seier, sitat: «**Øksnesmarka tilrås fortsatt å vera LNF**». (s. 48). (Utheva av oss).

Multiconsult har revidert denne rapporten (dat. 18.10.2018), men vi kan ikkje sjå at vesentlig nytt kjem fram. Heller ikkje til tredje høyringsrunde kan vi sjå om sjølve Åråsvågen var nokon del av det oppdraget som Multiconsult fekk i forhold til biologien i dei aktuelle områda.

Velforeininga ser fortsatt på dette som ein klar mangel ved Konsekvensutgreiingane.

I Multiconsult sin reviderte KU i høve 3. gangs høyring for Øksnesmarka (dat. 18.10.2018, s.50), seier dei nok ein gong at, sitat; «**Øksnesmarka vert tilrådd til framleis å vera LNF**». (Utheva av oss).

Og underleg nok; KU-en synes for oss framleis å vera lite vektlagt av Austrheim kommune.

Framleis kan vi heller ikkje sjå at det er vurdert om det eksisterande oppdrettsanlegget, eller et mogelig sterkt utvida oppdrettsanlegg, vil påverka tryggleiken i det å køyre større fartøy inn og ut av Åråsvågen, eller i kva grad Åråsvågen i seg sjølv er egna til å køyra slike fartøy i.

Vi er også uroa i høve mogelege ulukker og ureining i samband med auka skipstrafikk i Åråsvågen. (Jfr. Server-ulukka).

Vil Austrheim kommune ha beredskap for å kunne handtera liknande hendingar?

I høve det mogelege industriområdet i Øksnesmarka vil Åråsvågen Velforening også på det sterkaste framleis oppmoda alle dei folkevalde i Austrheim kommune til å fylgje tilrådingane frå Multiconsult, og ikkje minst også tydeleg folkevilje, slik at Øksnesmarka og (deler av) Åråsvågen ikkje vert utbygd og øydelagd for all framtid.

Og til dei utbyggingsvenlege politikarane vil vi framleis seia;

Tenk nytt, tenk framtidsretta, og ikkje minst – tenk på at etterkomarane våre og skal kunne ferdast i, og oppleve, urørd natur!

.....
Jarle Dalberg
Leiar i Åråsvågen Velforening

Kopi: Fylkesmannen i Hordaland